

# Z R U G G I N S J O G G E L I

Basel ooni s "Joggeli", daas wäär fascht esoo,  
als wuordi s Minschter nit am Ryygnei stoo.  
Doch numme fuffzig Joor in der Vergangehait,  
het kuum epper, eppis iber s "Joggeli" gsait.  
Niemer het sich mit em Gedangge gwäält,  
dass deert näb der Biirs eppis groosses fäält.


Aber glyy drufaaben hänn männgi Lyt,  
d Mainig verdrätte, s wäär an der Zyt,  
dass au z Basel e richtigs Staadion stoot,  
wo me mit Frinde Fuessball go luege goot.  
E weeneli speeter, grad im rächte Momänt,  
het s Waarten uff s "Joggeli" s erseenten Änd.  
D WM isch in der Schwyz, und kuurz dervoor,  
effnet s "Joggeli" zem eerschte Mool syni Door.

E guets Joorzäät isch drufaabe verflosse,  
doo het denn au der FCB bschlosse:  
Der Landhoof syg z glai, drum wäär s z begriesse,  
d Gool ab sofoort im "Joggeli" z schiesse!  
In de näggschte Joor, in der Maischterschafft,  
het der FCB denn s unfassbaare gschafft:  
Vo fimfefuffzig Mätsch, im "Joggeli" inne,  
het äär der Geegner kaine lo gwinne.

Aber s isch nit numme mit Juubel verbunde,  
au druurigi Zyte sinn iberwunde.  
Voor allem wääred den achzger Joore,  
het der FCB vyyl an Boode verloore.  
Der Abstiig in s "B" het sich nit so vermyyde,  
d Fans vo Basel hänn vyyl miese lyyde.  
Iber zää Joor isch daas soo wyter gange,  
eerscht im vierenyynzig het er sich gfange.  
Der Uffstiig isch denn nämli glunge,  
voller Fraid hämmer unseri Faane gschwunge.

Doch gsemmer d Daatsach glaar uff em Disch,  
dass daas nooni der FCB vo friener isch.  
Und s isch au no koo, dass miir is denne,  
vom gliebte "Joggeli" hänn miese drenne.  
Voor fuffzig Joor het s der Aafang gnoo,  
doch denn isch s Ändi vom "Joggeli" koo.  
Aber numme kai Angscht, s isch nit verloore,  
scho glyy wiird s wiider nei geboore.

Und jetz isch s sowyt, mer sinn voller Muet,  
mer wisse, dass sich d Gschicht wiiderhoole duet.  
Im "neie Joggeli" git s gaar nyt z welle,  
s wiird wie s "alte" wiider als Feschtig zelle.  
Und doorum fraie miir is esoo,



In gueter Erinnerung isch s is bliibe,  
s "Joggeli", der Oort, wo Gschicht het gschriibe.  
Scheeni Momänt hämmer deerfen erlääbe,  
noch Siig und Maischterdittel strääbe.

Uff der andere Syte, de Drääne noo,  
entdyscht, ganz still us em "Joggeli" goo.  
Fir all daas zämme wämmer danggscheen saage,  
"Joggeli", mer dien Dy im Härze draage.

Und ganz zem Schluss, zem dää Zeedel z schliesse,  
wämmer s "alte" verabschiide - und s "neie" begriesse...

## W Ä Ä R N I T G U M P T, D Ä Ä I S C H K A I B A S L E R !